

Reykjavík, 18. október 2018  
5.14

Umhverfis- og auðlindaráðuneytið  
Skuggasundi 1  
101 Reykjavík

## Efni: Umsögn um breytingu á loftslagslögum

Vísað er til fyrirhugaðs frumvarps um breytingar á loftslagslögum nr. 70/2012, sbr. mál S-138/2018 í samráðsgátt stjórnarráðsins. Eftirfarandi eru athugasemdir Orkuveitu Reykjavíkur vegna málsins en þær eru settar fram í nafni fyrirtækisins og dótturfélaga þess. Þar sem eftirleiðis er vísað til OR er því verið að vísa til samstæðunnar í heild sinni og afstöðu hennar.

OR fagnar því að sett hafi verið á fót loftslagsráð sem hafi því veigamikla hlutverki að gegna að gera ráðstafanir til að draga úr losun gróðurhúsalofttegunda á Íslandi. Jákvætt er og einnig að veita eigi ráðinu fastan sess með því að kveða sérstaklega á um það í löggjöf. Þannig sé staða þess tryggð og lagalegur rammi settur utan um starfsemi þess. Brýnt er þó að gleyma ekki því hlutverki sem ráðinu var ætlað með þingsályktun frá árinu 2016 þ.e. að miðla fræðslu og veita einstaklingum, fyrirtækjum, stofnunum og sveitarfélögum aðstoð við að minnka losun gróðurhúsalofttegunda og veita ráðgjöf um viðbrögð við áhrifum loftslagsbreytinga, sbr. e. lið hennar.

Hvað samsetningu ráðsins varðar er eðlilegt að löggjöfin útfæri hverjir skuli eiga sæti í því og að tekið sé mið af því hvernig samsetning þess er í dag. Ekki má gleyma því að mikilvægt er að allir hagsmunaaðilar eigi fulltrúa í ráðinu þannig að raddir allra haghafa heyrist í störfum ráðsins. Jákvætt sé að hagsmunirnir nái þvert á ráðuneyti og að svo mikilvægt mál fái sess meðal sem flestra þeirra. Að þessu sögðu er mikilvægt að hafa í huga að skilgreining á því hverjir teljist vera helstu hagsmunaaðilar kunna að vera fleiri en þeir sem upp eru taldir í greinargerð umhverfis- og auðlindaráðuneytisins. Þannig kunna einkaaðilar og fyrirtæki að hafa mikið til málanna leggja m.a. OR sem getur miðlað upplýsingum um reynslu sína í þessum málum.

OR telur mikilvægt að frumvarpið verði þannig úr garði gert að það útfæri hvata og tryggi einnig að allir sem þurfi geti fengið aðstoð við að afmarka skýra og metnaðarfulla stefnumiðaða nálgun þannig að ná megi fram þeim markmiðum sem að er stefnt með löggjöf um loftslagsmál, einkum að draga úr losun gróðurhúsalofttegunda og auka bindingu kolefnis úr andrúmslofti osfrv.

Þá er mikilvægt að frumvarpið útfæri leiðir sem eru til þess fallnar að hvetja til nýsköpunar og þróunar. Það þarf að styrkja alla þá góðu vinnu sem nú þegar er í gangi enda mikið sem nú þegar er gert og mörg fyrirtæki eru með skýra framtíðarsýn. Það kom vel í ljós í erindum hjá fulltrúum orku- og veitufyrirtækja, sjávarútvegs, flugsamgangna, iðnaðar og fjármálalífs sem haldin voru á Umhverfisdegi atvinnulífsins í Hörpu þann 17. október sl.

OR er leiðandi samstæða við útreikning, markmiðasetningu og upplýsingagjöf í loftslagsmálum. OR hefur t.d. minnkað kolefnisspor orkunnar sem framleidd er um nær 25% á undanförnum þremur árum. Einnig hefur OR verið leiðandi í orkuskiptum í samgöngum. Ljóst er að hefði ekki komið til framlag úr opinberum sjóðum hefði opnun Hringvegarins fyrir rafvæddar samgöngur tekið mun lengri tíma en raun varð á. Samvinna atvinnulífs, sveitarfélaga og ríkisvalds er því nauðsynleg.

OR hefur sett sér metnaðarfull loftslagsmarkmið sem krefjast tíma, hug- og verkvits og fjármagns en sem einnig hafa sýnt að geta aflað fyrirtækinu tekna. Leiðarljós samstæðunnar er sporlaus vinnsla til framtíðar sem er forsenda framþróunar í átt að kolefnishlutlausu samfélagi.

Verði eftir því óskað er OR tilbúið til að gera ráðuneytinu frekari grein fyrir umsögn sinni og einstökum efnisatriðum hennar.

Virðingarfyllt,



Íris Lind Sæmundsdóttir  
lögfræðingur



Hólmfríður Sigurðardóttir  
umhverfisstjóri

Afrit: Samorka